



## Fasnacht 2003

Sujet: S' Hallebad an dr Bahnhofstroos

Liebi Lüt am Strooserand  
 glaubet Ihr das mir es Hallebad händ  
 denn euses Sujet: „S' Hallebad an dr Bahnhofstroos“  
 zeigt in Prattele isch wieder öbis los.  
 doch liebi Lüt diend nit zwit dänke  
 wänd mir Euch villicht in e falschi richtig länke  
 oder isch das nur eusi Phantasie  
 und am Änd isch alles ganz anders gsi  
 will im Dorf passiere so luschtigi Sache  
 wo me denn cha drüber lache.

Zum Bispel die leere Parkuhre mit de rote Etikette  
 jede isch froh gsi, wämer wette,  
 oder dr Gmeiniverwalter so hämer verno  
 wo schints z' viel Lohnerhöchig het bicho,  
 luschtig isch z' Prattele s' Ämple lease  
 me sait es isch wäge de hohe Preise,  
 au muesch di um d' Weiere, s' Central, d' Chlemmi bange  
 weisch nie trinki bi dem Wirt s' letscht Mol e Stange,  
 d' NS Handballer sind nimm die Beschte  
 hejo bim Lüdi lersch au nur theaterle und feschte,  
 bim Komitee gilt als Ufnahmepflicht nüm graui Hoor  
 lut Plageette sind's in de Wächseljoor,  
 s' chönnt do no viel me über Prattele sto  
 doch miemer jetzt zu eusem Süjet cho.

S' isch wirklich passiert und scho verbi  
 letscht Joor im Oktober isch es gsi  
 s' het de ganz Tag nur gschifft und gränet  
 uf de Stroose bisch nur nasse Lüt begänet  
 hesch dänkt jetzt gangi go ichtaufe im Coop  
 dört bisch den im trochne, Gott lob  
 falsch dänkt, s' isch nit zum begriffe  
 duett's in de renovierti Coop inneschiffe  
 den die tolli Decki het es Leck  
 d' Filialeiter-Stellverträterin het ei Schreck  
 macht derzu ane no eis Gschrey  
 sait: "Hüt het dr Chef au no frey"  
 huscht im ganze Lade hin und her  
 findet Problemlösing zimlig schwer  
 duett trotzdem s' Bescht drus mache  
 zum Glück git's au kei Wasserlache  
 will s' Wasser, ich glaub mir spinne  
 sammlet sich im Tiefchüeler bi de Essware inne  
 s' Positive am ganze gar nid schad  
 so bechunnt Prattele es neus Hallebad.  
 De Coop isch sowieso dr Hit  
 sit dr Renovation näme mir es Plänli mit  
 will de muesch sit denn alles go sueche  
 empfinde mir eso, euri Dorfplatzrueche.

Jetzt hämer no en andere Hit  
 sit 15 Joor mache mir an dr Fasnacht mit  
 en Grund zum feschte, alles klar?  
 drum gits das Joor e Jubiläums-Bar  
 sie isch wie immer im Keller vom Schlossgarte  
 zu folgende Zyte so miender nit warte

Sonntig, 09.03.2003 20.00 - ??? Uhr  
 Zyschtig, 11.03.2003 20.00 - ??? Uhr  
 Samschtig, 15.03.2003 20.00 - ??? Uhr

[www.dorfplatzrueche-prattele.ch](http://www.dorfplatzrueche-prattele.ch)

[info@dorfplatzrueche-prattele.ch](mailto:info@dorfplatzrueche-prattele.ch)